



19. Maj 2020

UPA 2020/36
Aqqalu C.Jerimiassen

Nunatsinni illersornissamut politikkimut, naalagaaffiup isumannaatsuunissaanut politikkimut, nunanullu allanut politikkimut qanoq ililluta oqartussaaqataanerunissarput anguniarsinnaaneripput pillugu apequteqaat aallaavigalugu oqallinnissamik siunnersuut.

(Demokraatit Inatsisartuni gruppiat)

“Maanna inissisimaffigisatsinni Naalagaaffeqatigiinnut ilaanitsinni iluaqutissartaasut ajoqutissartaasunit amerlanerummata”.

Oqaaseqatigiit atuariikkakka tassaapput Demokraatit partiit anguniangaasa siunertaasalu allattorsimaffianni allaqqasut ilaat.

Atuarlugu aallartikkakku oqallisissiaq partiip ilisarnaataa qiviaqqeqqaalaarpara uppersilluarusullugu ilumut Demokraatinit oqallisissiaanersoq, puittuungaleraluaramami partiit arlaasa Demokraatikkut namminneq aappaluttukkunik taasagaasa ilaanneersersoq, immaqaluunniit Siumukkunneersersoq.

Tupaallannarpallaarunnaarporli eqqarsaatigeqqilluarnerani, tassami sermitsiaq.ag ukioq kingulleq aggustip 31-iani saqqummertumi, Demokraatit inatsisartunut ilaasortaataataat Steen Lyngé USA-p præsendetiata aggersarneqartariaqarneranik oqariartuuteqarmat nunatta namminiilivinnissaanut illersornissakkullugooq siunertalimmik.

USA assut uani aningaasaliisimanagera kr.83 mio.-nik neqitsiullugu eqqaaniarneqajjaavoq, kisianni ilumut sooq taamannaanaq neqitarineqarsinnaava? Nunatut ineriartortutut piitsutut aningaasanik USA-p nunanut allanut aningaasaliissutigisartagaanit aningaasanik atuisoqarpoq, imaappoq nunanut Somaliakkutut ittunut nalimmatilersimajunnarsivugut taakku aningaasat akuerineqarmata, tupinnaqaarlu tamanna Demokraatitaaq qujarutingaarlugu tigummassuk.

Aammami aningaasat taakku eqqarsaatigeriaraanni eqqarsarnartoqaaloqaaq ernumaammernarsinnaasumik, tassami aningaasaliiffigineqanngilagut, aningaasaliiffigisulliuku imminnut aningaasanik sulititassaminik paasissutissanik qulaajaanissamininnut siunertalinnik, assigiinnannginnerulugu taassallugu imannak; paasissutissanik inatsisitigut akuerisamik tillinniarneq?

Namminersornermut inatsiseqarpugut, taannaannguatsiarporluttaaq Demokraatit eqqartorneqaleqqaalermat suna tamaat sakkungalugu ersisaarutigisimasaat suna tamarmi ajutumiilernerarlugu.



Naalagaaffeqatigiinnermut tunngatillugu Namminersornermut inatsisikkut inuiattut akuerisaanikuuvugut, nammineq nunatsinni oqaatsigut atorlugit inuusinnaalluarpugut, ila suna nuna taamannak allamik pineqarsinnaava nunap inoqqaavinik taaneqartartunik amerlanerussuteqartunik najungaqarfigineqartoq?

Eqqillit nunaminnik arsaangaasimapput Amerikap nunavittaani, avannaaniuppat kujataaniuppat, ilaallumi allaat nunguinnartarsimallutik, uagut nunatsinni ulloq manna nallerpoq sulit nungutaanikuunata kiffaanngissuseqarluta inuusugut, arlalitsigut nunarsuarmioqatitsinnut naleqqiullugu atungarissaangaarluta inuuvugut, taamaammallu nunat pingajuisut taaneqarnissamut piukkunnarpallaanngivikkaluarluta.

Atagumi immaqa bloktilskudit piilaariarlugit nunanut allanut akisussaaffik illersornissarlu tamaat tigullugu misililaarutsigu, nunanullu allanut isumaqatiginninniarnert piaarnerpaamik aallartillugit aningaasat annaasassatta matussutissaanik qinaasiniapallalluta?

Nunatut ataasiakkaatut nukittusinnaavugut, ataatsimoorlutali nukittunerpaassaagut, nunanimmi namminiivittunik ullumikkut annerusumik soqarunangilaq, tamarmik qanoq arlaatigut suleqatigiiffeqarput, EU, NAFTA, PAFTA, SAFTA allarpassuillumi. Uagut Naalagaaffeqatigiinnerup iluani illersornissakkut ilutsinnilu niueqatigiinnikkut killilersungaangitsumik immitsinnut suleqatigiippugut. Nunanullumi allanuttaaq niueqateqartinniartilluta akornutitaqanngilluinnartumik ingerlataqarsinnaajuartarpugut Naalagaaffeqatigiinnerup iluani sumilluunniit aporfissaliinngitsumik, arlaannik Kunneqarfiup iluani nunanullu allanut innarliisinnaasumik soorunami peqartinnangu.

Nunapiluunersuaq eqqissisimatitaaq nunatta kangiata avannaarpiarsuaniittoq erfalasuleriartorneqartuartarpoq, nunatsinni ataasiusumi eqqissilluta inuusinnaasuaannaqqulluta. Uagut Atassummiik erseqqissumik oqaatigissavarput, Naalagaaffeqatigiinneq maannakkutut ilusilik 1979-imiilli arlalippassuartigut inerisarneqarsimasoq pisinnaatitaaffippassuarnillu ammaassiviusimasoq sulit nukittunerusumik atorsinnaasariaqaripput.

Unalu paatsorneqaqqunngilarputtaaq, naqissuserniarneqassalluta USA-mut akerliusugut, præsidentiatami nunarput pisiariumangaluallarmagu akeqanngivimmik nunarsuaq tamakkerlugu nunarput ussasaarutigilluavippaa, naak siunertarineqartoq iluatsinngitsooraluartoq.

USA sorpassuartigut suleqatiginera ingerlatikuttoorsinnaavarput, illersornissatsinnulli nunanullu allanut isumaqatiginninnartarnernut tunngatillugu salliusunngortinniassanngilarput Naalagaaffeqatigiinnermiik aniniaannarluta, ullummi arlaanni itertariaqanngilagut nunatsinni inuiattut ikinnerussuteqateqaleriataarsimalluta, Namminersornermut inatsisikkut naalagaaffeqatigiinnikkullu tamanna eqqanaarluinnaqqagatsigu pitinnginnissaa.

Oqallisissiaq allanakannersoq sulit oqaasissarpassuaqarfiusinnaangaluaqaaq, Atassummiilli oqaatiginiakkagut Demokraatikkunnut kaammattuugilluannarusuppagut eqqarsaatigilluaqqullugit.